



PENGERUSI JAWATANKUASA  
KIRA-KIRA WANG NEGARA (PAC)  
MERANGKAP AHLI PARLIMEN ROMPIN  
PEJABAT JAWATANKUASA KIRA-KIRA WANG NEGARA  
PARLIMEN MALAYSIA, JALAN PARLIMEN  
50680 KUALA LUMPUR

Tel : 03-2601 7263 / 2698 6852 (DL)  
Faks : 03-2698 9218  
Email : [pacparlimen@parlimen.gov.my](mailto:pacparlimen@parlimen.gov.my)  
Laman Web : <http://www.parlimen.gov.my/pac>

13 MAC 2017

**KENYATAAN MEDIA YB DATO' SRI HASAN BIN ARIFIN, PENGERUSI PAC PARLIMEN PEMBENTANGAN LAPORAN PAC PARLIMEN BERHUBUNG PENGURUSAN PROGRAM PEMBANGUNAN SOSIOEKONOMI MASYARAKAT ORANG ASLI DI BAWAH KEMENTERIAN KEMAJUAN LUAR BANDAR DAN WILAYAH (KKLW).**

- 1) PAC Parlimen hari ini, membentangkan Laporan PAC berhubung Pengurusan Program Pembangunan SosioEkonomi Masyarakat Orang Asli Di Bawah Kementerian Kemajuan Luar Bandar Dan Wilayah (KKLW) di Dewan Rakyat.
- 2) Isu ini dibangkitkan dalam Laporan Ketua Audit Negara (LKAN) Tahun 2014 Siri 3 yang dibentangkan di Dewan Rakyat pada 23 November 2015.
- 3) PAC Parlimen memanggil prosiding terhadap isu ini, pada 5 September 2016 dan Dato' Mohd Ariff Bin Ab Rahman, Ketua Setiausaha KKLW ketika itu, hadir di hadapan PAC Parlimen bagi memberikan penjelasan terhadap isu-isu yang dibangkitkan dalam berhubung Pengurusan Program Pembangunan SosioEkonomi Masyarakat Orang Asli.
- 4) Dalam prosiding berkenaan, PAC Parlimen membangkitkan isu-isu seperti berikut:
  - i. **Lanjutan Masa Tidak Mendapat Kelulusan Jawatankuasa Sebutharga.**

Lanjutan masa bagi dua kerja sebutharga yang masing-masing bernilai RM220,000 dan RM424,500 tidak diluluskan oleh Jawatankuasa Sebutharga sebaliknya hanya diluluskan oleh Pengarah dan Timbalan Pengarah JAKOA. Tiada penurunan kuasa diberikan kepada kedua-dua Pengarah dan Timbalan Pengarah berkenaan.
  - ii. **Meter Air Tidak Berfungsi.**

Meter yang dipasang di tujuh kawasan membabitkan 809 buah rumah tidak berfungsi dan tidak memberi manfaat kepada masyarakat Orang Asli di kawasan berkenaan.
  - iii. **Pertindihan Projek.**

Terdapat kawasan penempatan Orang Asli yang menerima kemudahan bekalan air melalui dua program iaitu, Bekalan Air Terawat (BAT) dan Program Bantuan Rumah (PBR) menyebabkan rumah-rumah berkenaan memiliki 2 tangki air serta mendapat bekalan dari dua sumber. Kegagalan menyelaraskan kedua-dua projek berkenaan telah menyebabkan berlakunya pembaziran.

**iv. Justifikasi Pembinaan Jambatan Gantung Kampung. Santeh, Kuala Kangsar, Perak.**

Tiada justifikasi bagi pembinaan jambatan gantung yang bernilai RM404,161 di Kampung Santeh, Kuala Kangsar, Perak. Jambatan berkenaan tidak menghala ke mana-mana jalan raya. Di samping itu, kontraktor gagal menyiapkan projek berkenaan walaupun lanjutan masa telah diberikan sehingga 17 Februari 2014. Keperluan untuk mengenakan denda kepada kontraktor sekiranya gagal menyiapkan kerja juga tidak dinyatakan dalam dokumen sebutharga projek berkenaan.

**v. Pengurusan Input Benih Penanaman Getah.**

Penanaman anak getah secara konvensional oleh peserta adalah tidak tersusun kerana kurang pemantauan oleh Pegawai Pertanian JAKOA daerah. Keadaan ini menyebabkan anak pokok tidak hidup subur dan membesar.

5) Berikutan itu, PAC Parlimen membuat rumusan bahawa:

- i) Pemasangan meter air bagi bekalan air ke penempatan Orang Asli adalah satu pembaziran kerana tujuan sebenar pemasangan meter adalah bertujuan mendidik masyarakat Orang Asli berjimat dalam menggunakan air;
- ii) Kos pemasangan meter dibuat secara *lump sum* dan tidak dipecahkan mengikut kos meter, kos pengangkutan dan kos pemasangan. Kaedah sebegini telah memberi gambaran seolah-olah terdapat perbezaan yang ketara dalam kos pemasangan meter di rumah-rumah masyarakat Orang Asli; dan
- iii) Pengenalan sesuatu inisiatif seperti mengenakan bayaran air kepada masyarakat Orang Asli telah dilakukan tanpa berbincang terlebih dahulu (*mengadakan engagement*) dengan mereka walaupun tujuannya untuk mendidik mereka.

6) Berdasarkan rumusan berkenaan, PAC Parlimen mengesyorkan kepada Kerajaan supaya:

- i) Kaedah yang lebih berkesan dan ekonomik perlu digunakan bagi mendidik masyarakat Orang Asli untuk berjimat dalam penggunaan air dan bukannya dengan memasang meter air yang akhirnya tidak digunakan;

- ii) Kaedah kos *lump sum* tidak harus digunakan dalam pemasangan meter air. Kos hendaklah diperincikan kepada kos meter, pemasangan dan pengangkutan bagi projek-projek yang akan datang;
  - iii) Pembincangan (*engagement*) perlu diadakan dengan ketua masyarakat Orang Asli sebelum sesuatu pembaharuan diperkenalkan kepada mereka;
  - iv) Pihak KKLW dan JAKOA akan dipanggil pada masa hadapan bagi memberikan penjelasan kepada PAC sama ada pendekatan yang diambil berhubung keberkesanan pemasangan meter air; dan
  - v) KKLW dan JAKOA hendaklah lebih peka dan prihatin dalam menguruskan hal-ehwal masyarakat Orang Asli kerana PAC memandang serius kelemahan yang dilaporkan oleh JAN dan jika JAN tidak melaksanakan pengauditan terhadap isu ini berkemungkinan amalan mengambil mudah, tidak cakna dan menganggap remeh temeh dalam menguruskan masyarakat Orang Asli akan berterusan.
- 7) Orang ramai yang berminat untuk membaca dan meneliti Laporan PAC Parlimen berhubung Pengurusan Program Pembangunan SosioEkonomi Masyarakat Orang Asli Di Bawah Kementerian Kemajuan Luar Bandar dan Wilayah (KKLW), boleh memuat turun (*download*) laporan berkenaan di laman web PAC di alamat [www.parlimen.gov.my/pac](http://www.parlimen.gov.my/pac).

Yang Berhormat Dato' Sri Hasan Arifin  
Pengerusi Jawatankuasa Kira-Kira Wang Negara  
Parlimen Malaysia